

16. marts 2017

UPA 2017/180

Matumuuna Inatsisartut suleriaasianni § 33 naapertorlugu aalajangigassatut siunnersuut saqqummiuppara:

Silaannakkut angallannerup tiguneqarnissaa pillugu Naalakkersuisut suleqatigiissitamik pilersitsinissaannut Inatsisartut aalajangiinissassaattut siunnersuut.
(Inatsisartunut ilaasortaq Per Rosing-Petersen, Partii Naleraq)

Siunertaa

Suleqatigiissitap siunertarissavaa Nunatsinni silaannakkut angallannerup oqartussaaffigilerneqarnissaa anguniarlugu aalajaniinissamut tunngavissiorinissaq. Suliap inernerissavaa nalunaarusiaq, tassanilu oqartussaaffiup tiguneqarneranut apeqqutit pingaarutillit qulaajarneqassapput aammalu oqartussaaffiup tiguneqarneranut suleriaasissaq qanoq ittuussanersoq siunnersuutigissallugu.

Tunuliaqutaa

Inatsisartut UKA2015-imi novembarip 19-ianni immik. 166-imi tamarmiullutik taasinikkut aalajangersimavaat Naalakkersuisut pisussaaffigilerneqassasut qallunaat naalakkersuisui attavigissagaat naalagaaffeqatigiinnerup iluani Canadami Islandimilu oqartussaasut peqatigalugit Atlantikup Avannaani Kalaallillu Nunatta qulaani timmisartukkut angalanerup pisortatigoortumik ingerlatsivittut oqartussaaffigilerneqarnissaa siunertaralugu oqaloqatigiinneq aallartinniassammat.

Maanna suliaq tamanna aallartinneqareermat isumaqarpunga taanna aallarnerfigalugu silaannakkut angallanneq pillugu oqartussaassuseq anguniarlugu alloriarneq tulleeq aallartinneqartariaqalersoq.

Tunngaviusumik Danmarkip Nunatsinni silaannakkut angallannermut oqartussaaffik tigummivaa. Islandimut Canadamullu isumaqatigiissutit isumaqatigiissusiorneqarsimasut

tassaapput qutsissusissaq (flyveniveau (FL)) 19.500 fodinik portussuseqartup iluani timmisartut ingerlaartarnerisa nakkutigalugit kiffartuunneqarnissaat pillugu isumaqatigiissutit.

Naatsorsuutigaara Naalackersuisut qallunaat naalackersuisuinut attaveqareerlunilu oqaloqatiginnilereersimasoq, tamannalu pissutigalugu piffissanngorsoraara silaannakkut angallannermut tunngassutillit oqartussaaffigilernissaat alloriarnertut tullinguuttoq.

Periarfissaliinissamut tunngavissaq

Namminersorlutik Oqartussat inatsisaat § 2 naapertorlugu suliassa qarfiit inatsisip iluaniittut Namminersorlutik Oqartussat ataaniilertarput. Suliassa qarfiit ilanngussaq I-ip ataaniittut, Namminersorlutik Oqartussanut nuunneqartarput piffissami Namminersorlutik Oqartussat namminneq aalajangigaanni. Suliassa qarfiillu ilanngussaq II-p ataaniittut (tassunga ilanngullugu silaannakkut angallanneq). Namminersorlutik Oqartussat suliassarilersarpaat Namminersorlutik Oqartussat namminneq aalajangigaanni naalagaaffeqatigiinnerup iluani oqartussat isumaqatigiinniuteqareernerisa kingorna. Silaannakkut angallannermut tunngassutillit ataatsimut tamarmiutillugit tiguneqartussaapput siusinnerusukkut pilersaarusioreersimasaq tunaartaralugu.

§ 1 naapertorlugu Namminersorlutik Oqartussat inatsisitigut oqartussaassuseq atortitsinerlu oqartussaaffigaat suliassani suliassa qarfinilu tiguneqareersimasuni. § 6-ilu naapertorlugu suliassa qarfiit Namminersorlutik Oqartussat §§ 2-4-miittut aningaasalerneqartassapput tiguneqareernerimik kingorna. Aammattaaq Namminersorlutik Oqartussat pigisat nalillit suliassa qarfimmu toqqaannartumik attuumassuteqartut tigunerini siulersulissavaat.

Kalaallit Nunaanni silaannakkut angallannerup oqartussaaffigilernissaanut suleqatigiissitaq

Suleqatigiissitamik pilersitsisoqassaaq kalaallit qallunaallu nunaannit oqartussaasunit attuumassuteqartunit sinniisuuffigineqartussanik:

Suleqatigiissitaq oqartussaaffinnit immikkut ilisimasaqarfiusunit makkunangga aallaaveqartunit sinniisuuffigineqarsinnaavoq: Nunanut Allanut Pisorta qarfik, Aningaasaqarnermut Naalackersuiso qarfik, Sanaartornermut Naalackersuiso qarfik, Trafik-,

Bygge- og Boligstyrelsen, Statsministeria aamma Nunatsinni Naalagaaffiup Aallartitaqarfia Forsvarsministerialu.

Suleqatigiissitaq sulinermini pisariaqartitsinini naapertorlugu paasissutissanik avataaniit aallertarsinnaavoq avataaniillu sammisaqartunit immikkut itisiligassani akuutitsisinnaalluni.

Suliassat

Suleqatigiissitap silaannakkut angallanneq tamakkiisumik allaaserissavaa, tassunga ilanngullugit suliassaqarfimmi suliassat suut pisariaqartinneqarnersut (oqartussaassuseq, silaannakkut angalanermi nakkutilliineq, silaannakkut angallannermi paasissutissiillutik kiffartuussisartut, nunat tamalaat akornanni suleqatigiinneq il.il.). Suleqatigiissitattaq misissorlugulu allaaserissavaa Nunatsinni oqartussaasut maannakkut Danmarkip Nunattalu piginnaaneqartitaanerisa iluanni silaannakkut angallannermut tunngassutillit tamakkiisumik tigunnginnerini suliassat ilaat nammineq suliarisinnaanera. Tassungattaq atatillugu Kangerlussuarmi FIR (Flight Information Region) namminersortoq Nunatta qulaani eqqaanilu silaannakkut angallannermut tunngasuni pilersinneqarsinnaanersoq qulaajarneqassaaq.

Suliassaq immikkoortunut marlunnut avillugu ingerlanneqassaaq, makkulu imarissavai:

I. Suliassap aallaqqaataani isumagineqassapput:

1. Silaannakkut angallanneq eqqarsaatigalugu Kalaallit oqartussat piginnaaneqartitaanerisa iluanni danskit oqartussat sinnerlugit suliaqarsinnaanissamut periarfissat misissorlugit. Immikkoortut ataasiakkaat tigujuartuarneqarnissaat eqqarsaatigalugu. Tamanna pissuteqarpoq Nunatsinni piginnaatsit silaannakkut angallannermut tunngassuteqartut tamakkiisumik tigunissaat sioqqullugu piginnaaneqalernissaat anguniarneqassammat.

2. Silaannakkut angallannermi paasissutissat pillugit kiffartuussisussat (maannakkut atuuppoq FIC) silaannakkullu angallannermi nakkutuliissussat Nunatsinniittut toqqarneqarnissaannut siunissami malittarisassat tassunga tunngassuteqartut allaaseralugit. Kiffartuussisut Nunatsinniittut toqqarneqarsinnaappata, atortut kiffartuussinermi atortussat suunersut nassuiaatigineqassapput. Aammattaq qulaajarneqassaaq atortut tunniunneqarsinnaanersut silaannakkut angallannermi oqartussaassuseq tigutserlugu.

3. Taamaattoqassappallu isumaqatigiissusiassamut missingersuusiaq qulaajaareernerup kingorna silaannakkut angallannermut tunngassuteqartuni oqartussaassutsip tiguneranut suliassartaasalu ingerlanneqarnerinut tunngassuteqartoq suliarineqassaaq.

4. Tamatuma saniatigut Nunatta silaannartaani eqqaanilu FIR-imik Nunatta iluani namminersortumik pilersitsinissami periarfissat piumasaqaatillu qulaajarneqassapput. Tassanittaaq pisariaqassaaq Nunatta qulaani eqqaanilu silaannakkut angallaviusartooq qanoq killilerneqassanersoq, ingammik Nunatsinni FIR namminersortoq pilersinneqassappat. Tassani suliap ingerlanneqarnerani siusinaartumik pisariaqassaaq ICAO naapissallugu Nunarput namminersortumik FIR-eqalersinnaanersoq pillugu qulakkeersinnaaqqullugu.

II. Suliassap iluani aappaattut isumagineqassapput makku:

1. Silaannakkut angallannermut tunngassutillit pingaarnersiorlugit nassuiaasiorfigineqarneri, tassunga ilaassapput oqartussaaffimmik tigusinermi periuseq qanorlu taanna imaqarnerisooq, ilaatigullu danskit malittarisassaasut Nunatsinnut atuuttut. Tassanissaaq qulaajarneqassaaq Kalaallit Nunaanni namminersortumik silaannakkut angallanneq pillugu inatsimmik pilersitsisoqassanersoq, taassumallu iluani sakkutooqarfinnut tunngassutilinni oqartussaassuseq qanoq ittuussanersoq qulaajarneqassaaq.

2. Atortussat tunniunneqarnissaannut tiguneqarnissaannullu tunngassutillit qulaajarlugit, uani aamma piginnittuunermit akuersissutinullu tunngassutillit.

3. Silaannakkut angallannermut tunngassutilinni atortutigut piginnaasatigullu pisariaqartitat qanoq ittuuneri nalilersorlugit.

4. Silaannakkut angallannermut tunngassutillit oqartussaaffigilernerata aningaasatigut nassatassai allaaseralugit, ilaatigulluunniit business case atorlugu (aningaasatigut paasissutissanik katersereernerup kingorna ajutoorutaasinnaasut ilanngullugit nalilersueriaaseq).

5. Oqartussaaffiup tigoreernerata kingorna kalaallit qallunaallu oqartussaasut qanoq sukkullu suleqatigiissinnaanersut allaaseralugu, nunat tamalaani pissutsit pisussaaffiliisut tassunga ilanngullugit.

Periusissaq

Suliassap immikkoortua siulleg suliareqqaarneqarlunilu naammasseqqaarneqassaaq. Suliap tamatumap saniatigut Nunatsinni namminersortumik FIR-eqalernissaanut periarfissat qulaajarneqassapput. Taava tamatuma kingorna suliassap immikkoortuata aappaa suliarineqassaaq.

Suliassap immikkoortuata siulliup takutippagu kiffartuussisussamik Nunatta iluani nassaartoqarsinnaasoq tamanna aallartisarneqarsinnaavoq suliassap immikkoortua tulleg suli aallartitsinnagu.

Suliarisassat allattorsimaffiat (kommissorium) tunuliaqutaralugu suleqatigiissitaq inerniagassat suunersut pillugit qulaajaassaaq, tamannalu tunngavigalugu ingerlaqqissaaq, piffissaq eqqarsaatigalugu anguniagassatut pilersaarussiaq tassunga aamma ilaassaaq.

Suliassap immikkoortua siulleg suliarisassat allattorsimaffiata atuutilernerata kingorna qaammatit arfinillit missaat qaangiuppata naammassereersimassasoq naatsorsuutigineqassaaq. Taamaattoq Nunatsinni namminersortumik FIR-eqalernissaanut apeqqutit FN-ip iluani kattuffissuarmut ICAO-mut qulakkeereerneaarsimanissaat piffissarititap iluani anguneqarsinnaanersut nalilersorneqaaqaarsimassapput.

Suleqatigiissitap tamakkiisumik suliai Nunatsinni danskillu akornanni oqartussanut nalunaarusiarineqassapput/allaaserineqassapput pilertornerpaamillu tamanna naammassineqassaaq suliassap imaannaanngitsuunera pissutigalugu.

Pisortanut aningaasatigut allaffissornikkullu kinguneriumaagassat

Siunnersuutip atuutilerneaqarnissaanut suliassat naalackersuisoqarfinnut soqutigisaqaqatigiinnullu assigiinngitsunut agguataarneqassapput. Ilimagineqartariaqanngilaq naalackersuisoqarfiit ilaat annertuumik artukkerneqassasut, suliassaq naalackersuisoqarfinni suliassanut allanut sanilliullugu suliarineqarsinnaammat. Angalanermut aningaasartuutit

ilimagineqartariaqarput, tamakkuli soqutigisaqatigiit akornaminni allatigut
ataatsimeeqatigisarnerisa saniatigut ingerlanneqarsinnaapput.

**Namminersortumik suliffiutilinnut aningaasatigut allaffissornikkullu
sunniutaasinnaasut**

Namminersortumik suliffiutillit eqqarsaatigalugit malunnaatilimmik taakkununga
tunnngassutilinni allannguisoqarnissaa ilimagisariaqanngilaq.

Innuttaasunut aningaasatigut allaffissornikkullu sunniutaasinnaasut

Innuttaasut kifartuunneqarnerannut allannguisoqarnissaa ilimagisariqanngilaq, taamaattoq
ilimagisariaqarpoq innuttaasut akornanni inuppassuit oqartussaaffimmik allamik
tigusisoqalernissaa anguniarlugu suliniuteqartoqarnera iluarisimaarissagaat.